

四庫全書

經部

欽定四庫全書

經部

五禮通考卷八十六

詳校官侍郎臣劉躍雲

給事中臣溫常綬覆勘

總校官進士臣繆琪

校對官助教臣汪錫魁

謄錄監生臣吳炳文

欽定四庫全書

五禮通考卷八十六

刑部尚書秦蕙田撰

吉禮八十六

宗廟時享

周禮天官甸師掌帥其屬而耕藉王籍以時入之以供齎  
盛

禮記祭義耕藉所以教諸侯之養也

樂記耕藉然後諸侯知所以敬

春秋桓公十四年秋八月壬申御廩災乙亥嘗穀梁傳  
御廩之災不志此其志何也以爲未易災之餘而嘗可  
也天子親耕以供粢盛以爲人所盡事其祖禰不若以  
已所自親者也 公羊傳御廩者何粢盛委之所藏也  
注黍稷曰粢在器曰盛委積也御者謂用於宗廟廩者  
釋治穀名禮天子親耕東田千畝以供粢盛躬行孝以  
先天下

白虎通天子親耕以共郊廟之祭

右親耕共粢盛

周禮天官內宰中春詔后帥外內命婦始蠶於北郊以爲祭服

禮記月令季春之月后妃齊戒親東嚮躬桑禁婦女觀省婦使以勸蠶事蠶事既登分繭稱絲効功以共郊廟之服

孟夏之月蠶事畢后妃獻繭乃收繭稅以桑爲均貴賤長幼如一以給郊廟之服

季夏之月命婦官染采黼黻文章必以灋故無或差貸  
黑黃蒼赤莫不質良毋敢詐僞以給郊廟祭祀之服

祭義古者天子諸侯必有公桑蠶室近川而爲之築宮  
僅有三尺棘墻而外閉之及大昕之朝君皮弁素積卜  
三宫夫人世婦之吉者使入蠶於蠶室奉種浴於川桑  
于公桑風戾以食之歲既單矣世婦卒蠶奉繭以示君  
遂獻繭于夫人夫人曰此所以爲君服歟遂副禕而受  
之因少牢以禮之古之獻繭者其率用此歟及良日夫

人縹三盆手遂布于三宮夫人世婦之吉者使縹遂朱  
綠之元黃之以爲黼黻文章君服以祀先王先公敬之  
至也

春秋桓公十四年公羊傳王后親蠶以共祭服  
國語魯語王后親織元統社而賦事烝而獻功  
白虎通后之親桑以共祭服

右親蠶共衣服

蕙田案親耕親蠶蓋廟享之敬以歲計者也

周禮地官牧人掌牧六牲而阜蕃其物以共祭祀之牲

牲

遂人凡國祭祀供野牲

注共野牲入於牧人以待事也  
疏謂牛羊豕在六遂者故曰

野牲牧人云掌牧六牲以待祭祀  
故知此野牲亦入牧以待事也

遂師凡國祭祀共其野牲

牧人凡祭祀共其犧牲以授充人繫之

注授充人者當  
殊養之  
疏牧

人養牲臨祭前三月  
授與充人繫養之

春官肆師大祭祀展犧牲繫于牢頒于職人

疏將有宗  
廟大祭祀

牧人以牲與充人之時肆師省閱其牲看完  
否及色堪爲祭牲及繫于牢頒付于職人也

地官充人掌繫祭祀之牲拴祀五帝則繫于牢芻之三

月享先王亦如之

疏上經天地外神已別于上故今以先王亦如之亦繫于牢芻之三月也

蕙田案以上五條言犧牲掌于牧人供于遂

人授于充人將授之時肆師又展省其牲以

頒之充人充人乃繫于牢芻之三月也

牛人凡祭祀供其享牛求牛以授職人而芻之

注享獻也獻神

之牛謂所以祭者也求終也終事之牛謂所以  
以繹者也宗廟有繹者孝子求神非一處

夏官羊人若牧人無牲則受布於司馬使其賈買牲而共之

地官稿人掌黍祭祀之犬

疏養犬曰黍此經是也知養豕亦曰黍者樂記云黍豕作

酒是養豕

曰黍也

春官鷄人掌共鷄牲辨其物

注陽祀用騂陰祀用黝陽祀祭于南郊及宗

廟

應氏搗謀曰周禮牧人掌牧六牲先儒以為馬牛羊犬豕鷄也然馬並未見之于吉祭惟大司馬喪祭奉詔馬牲牧人將事于四海山川飾黃駒則吉祭唯用五牲而已而大戴禮載曾子之言序五牲之先後貴

賤宗廟曰芻豢山川曰犧牲割列攘瘞是有五牲而  
曲禮牲號牛曰一元大武羊曰柔毛豕曰剛鬣豚曰  
腍肥犬曰羹獻鷄曰翰音亦  
不言馬有何號也此可見矣

蕙田案以上五條言六牲各有所掌之職豕  
人或當屬之冬官也

禮記曲禮天子以犧牛

注犧純  
毛也

周禮地官牧人凡陽祀用騂牲毛之

注陽祀謂祭天  
于南郊及宗廟

禮記檀弓周人牲用騂

蕙田案以上三條言犧牲毛色純全及所尚

王制宗廟之牛角握

注握謂長不出膚  
膚寸而合鄭注投壺禮云四指曰

疏公羊傳曰

扶扶則

膚也

周禮考工記梓人宗廟之事脂者膏者以爲牲

注脂牛  
羊屬膏

犬豕屬 疏疑者

曰脂釋者曰膏

蕙田案此二條言犧牲之體

詩小雅無羊三十維物爾牲則具

箋牛羊之色異者三  
十則共之祭祀索則

有之

禮記月令季夏之月命四監大合百縣之秩芻以養犧

牲令民無不咸出其力以祠宗廟社稷之靈

季冬之月乃命同姓之邦共寢廟之芻豢

疏寢廟先王與同姓國共

之故命同姓國共之言芻乃是牛羊而又云豢則是犬豕也宗廟備六牲故云芻豢也

凡在天下九州之民者無不咸獻其力以共寢廟之祀  
祭義古者天子諸侯必有養獸之官及歲時齋戒沐浴  
而躬朝之犧牲祭牲必於是取之敬之至也君召牛納  
而視之擇其毛而卜之吉然後養之君皮弁素積朔月  
月半君巡牲所以致力孝之至也

注歲時齋戒沐浴而躬朝之謂將祭祀卜

牲君朔月月半巡視之君名  
牛納而觀之更本擇牲意

國語楚語子期祀平王祭以牛俎于王王問於觀射父

曰祀牲何及

注王感俎肉而問牲用所及

對曰祀加于舉

注加增也舉人君朔

望之盛饌

天子舉以大牢祀以會

注大牢牛羊豕也會會三大牢舉四方之奠

王

曰其小大何如對曰烝嘗不過把握王曰何其小也對

曰夫神以精明臨民者也故求備物不求豐大是以先

王之祀也以一純二精

注一純心純一而潔二精玉帛也

三牲四時五

色六律七事八種

注七事天地民四時之務也八種八音也

九祭十日十二

辰以致之

注九祭九州助祭也十日祭至甲也十辰子至亥也擇其吉日令辰以致神

百姓

千品萬官億醜兆民經入咳數以奉之明德以昭之  
聲以聽之以告徧至則無不受休王曰芻豢幾何對曰  
遠不過三月近不過浹日

注遠謂三牲近謂鷄鶩之屬浹日十日也

### 右庀牲

蕙田案三月庀牲廟享之敬以月計者也

周禮大司馬中夏教芟舍遂以苗田獻禽以享禘  
冬教大閱遂以狩田入獻禽以享烝

林氏倚曰周家因祭祀而用田因田而教戰

禮記王制天子諸侯無事則歲三田一爲乾豆

注三田者夏不

田蓋夏時也周禮春曰蒐夏曰苗秋曰獮冬曰狩乾豆謂腊之以爲祭祀豆實也疏一爲乾豆者謂乾之以爲豆實豆實非脯而云乾者謂作醢及鷩先乾其肉故云乾豆是上殺者也

春秋桓公四年穀梁傳四時之田皆爲宗廟之事也春

曰田夏曰苗秋曰蒐冬曰狩四時之田用三馬唯其所

先得一爲乾豆

注上殺中心死速乾之以爲豆實可以祭祀

詩小雅車攻大庖不盈

傳一曰乾豆二曰賓客三曰充君之庖故曰左膘而射之達于

右牖爲上殺射右耳本次之射左髀達于右髀爲下殺而傷不獻踐毛不獻不成禽不獻禽雖多擇取三十焉其餘以與士大夫以習射于澤宮田雖得禽射不中不得取禽田雖不得禽射中則得取禽古者以辭讓取不以勇力取疏傳又因經大庖不盈廣言殺獸充庖之事一曰乾豆謂第一上殺者乾豆以爲豆實供宗廟也

白虎通王者諸侯所以田獵何也爲田除害上以供宗廟下以簡集士衆也

### 右田禽

蕙田案田禽以祭廟享之敬因乎時者也

禮記射義天子將祭必先習射於澤澤者所以擇士也

已射於澤而後射於射宮射中者得與於祭不中者不得與於祭不得與於祭者有讓削以地得與於祭者有慶益以地

古者天子之制諸侯歲獻貢士於天子天子試之於射宮其容體比於禮其節比於樂而中多者得與於祭其容體不比於禮其節不比於樂而中少者不得與於祭數與於祭而君有慶數不與於祭而君有讓

右擇士

周禮春官守祧掌守先王先公之廟祧若將祭祀其廟

則有司修除之其祧則守祧黝堊之

注廟祭此廟也祧祭遷主有司宗伯

也修除黝堊互言之有司恒主修除守祧恒主黝堊鄭司農云黝讀爲幽幽黑也堊白也爾雅曰地謂之黝墻

謂之堊

夏官隸僕掌五寢之埽除糞洒之事祭祀修寢

注五寢五廟之

寢也周天子七廟唯祧無寢詩云寢廟繹繹相連貌也前曰殿後曰寢汜埽曰埽埽席前曰拊洒灑也於廟祭寢或有事馬月令凡新物先薦寢廟疏祭祀則在廟可知復云修寢者寢或有事不可不修治之也

### 右修除

周禮天官大宰前期十日帥執事而卜日

注前期前所誦之日也十

日容散齊七日致齊三日疏前期者謂祭日前夕爲期云前期十日者即是祭前十一日大宰帥宗伯大卜之屬執事之人而卜日云前期前所誦之日者此依少牢所誦之日即祭日也凡祭祀謂于祭前之日爲期今言前期十日者謂祭前十一日卜卜之後日遂戒使散齊致齊故云十日容散齊七日致齊三日案禮記祭統云散齊七日以定之致齊三日以齊之

春官肆師凡祭祀之卜日宿爲期詔相其禮

大宗伯凡享大鬼帥執事而卜日

太史大祭祀與執事卜日

龜人祭祀先卜若有祭事則奉龜以往

太卜大祭祀則眡高命龜

注士喪禮曰宗人即席西面坐命龜疏引士喪禮証天

子命龜處所與士禮同

禮記表記內事用柔日

疏乙丁巳辛癸五偶爲柔也

右卜日

蕙田案卜日廟享之有事於旬日者也

周禮天官太宰祀五帝則掌百官之誓戒與其具修前期十日遂戒享先王亦如之

地官遂師凡國祭祀審其誓戒

春官太史戒及宿之日與羣執事讀禮書而協事

疏戒謂散

齊七日宿謂致齊三日當此二日之時與羣執事與祭之官讀禮書而協事恐事有錯失物有不供故也

夏官司士凡祭祀掌士之戒令

秋官條狼氏凡誓執鞭以趨於前且命之

注誓者謂將祭祀時也郊

特牲說祭祀之誓曰卜之日王立於澤親聽誓命受教諫之義也

陳氏禮書天子諸侯誓以卜吉之日戒宿以卜尸之

日大夫前有十日之戒則與天子諸侯同後有一日

之宿則與天子諸侯異此所謂有曲而殺也士有筮日而無諏日有宿而無戒與大夫異宿以三日而不以一日則與天子諸侯同此所謂有順而撫也

右誓戒

周禮天官膳夫王齊日三舉

王府王齊則共食王

鬯人凡王之齊事共其秬鬯

禮記玉藻齊則綰結佩而爵鞞

注綰屈也結又屈之思神靈不在事也爵鞞齊

服元端

君羔幣虎犴

注此君齊車之飾疏  
皇氏曰君謂天子諸侯

祭義致齊於內散齊於外齊之日思其居處思其笑語

思其志意思其所樂思其所嗜齊三日乃見其所爲齊

者

注致齊思此五者也疏  
此一節明祭前齊日之事

祭統及時將祭君子乃齊齊之爲言齊也齊不齊以致  
齊者也是故君子非有大事也非有恭敬也則不齊不  
齊則於物無防也者欲無止也及其將齊也防其邪物

訖其耆欲耳不聽樂故記曰齊者不樂言不敢散其志也心不苟慮必依於道手足不苟動必依於禮是故君子之齊也專致其精明之德也故散齊七日以定之致齊三日以齊之定之之謂齊齊者精明之至也然後可以交於神明也是故先期旬有一日宮宰宿夫人夫人亦散齊七日致齊三日君致齊於外夫人致齊於內然後會於太廟

疏此一節明將祭齊戒之義并明君與夫人皆致齊會于太廟夫嬪交親行祭之義

外謂君之路寢內謂夫人正寢是致齊並皆於正寢其實散齊亦然

周禮春官世婦掌女宮之宿戒

疏此亦祭前十日戒之使齊祭前三日又宿之

禮記曲禮齊者不樂不弔

禮器三月繫七日戒三日宿慎之至也

昏義齊之元也以陰幽思也故君子三日齊必見其所祭者

揚子孝子有祭乎有齊乎夫能存亡形屬荒絕者惟齊乎故孝子之於齊見父母之存也

劉向說苑聖主將祭必潔齊精思若親之在方興未

登惛惛憧憧專一想親之容貌彷彿此孝子之誠也  
四方之助祭空而來者滿而反虛而至者實而還皆  
取法則焉

陳氏禮書君齊於路寢夫人齊於正寢士大夫亦各  
齊於適寢散齊夜處適寢亦豫外事所謂致齊於內  
散齊於外是也致齊晝夜處適寢不豫外事所謂非  
致齊也不晝夜居於內是也

右齊

應氏攜謙禮樂彙編王禮篇宿尸前宿一日大宗伯宿戒尸明日朝大宗伯卜尸如卜日之禮命曰孝王某來日丁亥用薦歲事於皇祖某公以某妃配某氏以某之某爲尸

世祖以下同

尚饗吉則遂宿尸七廟共七

尸太祖之尸太卜卜之文武二尸卜師二人卜之四

廟卜人四人分卜之

若大禘則毀廟之主昭穆各一尸共九尸

大宗伯立

於尸外門外羣執事各立於其後北面東上尸冕服出門左西面宗伯辟還北面再拜稽首傳擯介告曰

孝王其來日丁亥用薦歲事於皇祖其公以某妃配  
某氏筮子爲皇祖之尸占曰吉敢宿祝許諾致命尸  
許諾祝傳命於擯擯傳介宗伯又再拜稽首宗伯退  
尸送揖不拜六尸皆如之若不吉則遂改筮尸

依周禮儀

禮定

蕙田案天子諸侯之祭必有尸祭統君執圭  
瓚灌尸是諸侯之祭有尸也周禮守祧各以  
其服授尸是天子之祭有尸也公羊子何休

注曰禮天子以卿爲尸諸侯以大夫爲尸儀禮特牲饋食筮尸疏大夫士以孫之倫爲尸若天子諸侯雖用孫之倫取卿大夫有爵者爲之故鳧鷖曰公尸蓋以孫列之卿大夫爲尸也尸之數則一廟一尸天子七諸侯五禮器周旅酬六尸大祫禮毀廟之主升合食而立二尸共九尸周禮大司樂尸出入則奏肆夏逆尸相尸禮小祝大祭祀逆尸祭統所使

爲尸者子行父北面而事之注云天子諸侯  
之祭朝事延尸於戶外是以有北面事尸之  
禮陳氏祥道曰儀禮大夫前祭一日筮尸士  
則前祭三日筮尸大夫於尸再宿而戒士於  
尸一宿而無戒則大夫之禮有所屈士之禮  
有所伸推而上之則人君蓋亦前三日筮尸  
而宿戒之儀又加隆矣據此則宿尸之儀雖  
亡亦可理推惟宿尸者不知何人應氏謂大

宗伯宿之未詳何据

右卜尸宿尸

應氏摛謙禮樂彙編王禮篇賓用先代之後賓如宗伯服出門左傳擯如諸公相朝之儀西面再拜宗伯東面再拜擯曰王薦歲事嘉賓將涖之敢宿介傳命賓曰某屏之臣某敢不敬奉王事介傳命宗伯再拜賓答拜宗伯退賓拜送宗伯答拜

二王之後助祭見詩傳

蕙田案宿賓之禮天子諸侯之祭無所攷見

其儀特牲有之書云虞賓在位商頌我有嘉  
客詩云殷士膚敏裸將于京頌有客有客亦  
白其馬書微子之命作賓於王家左傳宋先  
代之後于周爲客則天子諸侯之祭蓋亦有  
賓而賓獻爲九獻之一應氏據以補宿賓一  
條今存之

右宿賓

周禮天官小宰以灋掌祭祀之戒具令百官府共其財

用治其施舍聽其治訟

注瀆謂其禮法也戒具戒官有事所當供

宰夫以式灋掌祭祀之戒具

疏言式法者謂祭祀大小皆有舊法而戒勅使共具

之凡禮事贊小宰比官府之具

注比校次之使知善惡是也

夏官祭僕掌受命于王以眡祭祀而警戒祭祀有司糾

百官之戒具

蕙田案以上三條掌戒具之官

小宗伯辨六彝之名物以待裸將

鬯人掌共秬鬯而飾之凡祭事廟用脩凡裸事用概

鬱人掌裸器凡祭祀之裸事和鬱鬯以實彝而陳之凡裸玉濯之陳之

典瑞裸圭有瓚以肆先王大祭祀共其玉器而奉之

蕙田案以上裸具

小宗伯辨六尊之名物以待祭祀

注待者有事則給之

司尊彝掌六尊六彝之位詔其酌辨其用與其實春祠夏禴其朝踐用兩獻尊其再獻用兩象尊皆有壘秋嘗冬烝其朝踐用兩著尊其饋獻用兩壺尊皆有壘凡

六尊六彛之酌鬱齊獻酌醴齊縮酌盎齊沈酌凡酒修酌

天官酒正凡祭祀以灋共五齊三酒以實八尊大祭三貳中祭再貳小祭壹貳皆有酌數

酒人掌爲五齊三酒祭祀則供奉之以役世婦凡祭祀

供酒以往

注世婦謂宮卿之官掌女宮之宿戒及祭祀比其具酒人共酒因留與其奚爲世婦役亦

官聯

禮記禮運元酒在室醴醑在戶粢醑在堂澄酒在下

注周

禮五齊一曰泛齊二曰醴齊三曰盎齊四曰醞齊五曰沈齊字雖異醞與盎澄與沈蓋同物也奠之不同處重古畧近也疏此明祭祀酒之所陳之處元酒在室者元酒謂水也以其色黑謂之元而大古無酒此水當酒所用故謂之元酒以今雖有五齊三酒貴重古物故陳設之時在於室內而近北醴醞在戶醴謂醴齊醞謂盎齊以其後世所爲賤之陳列雖在室內稍南近戶染醞在堂者以卑之故陳列又南近戶而在堂澄酒在下者澄謂沈齊也酒謂三酒事酒昔酒清酒之等稍卑之故陳在堂下也云醞與盎澄與沈蓋同物者以酒正文醴緹之間有盎此醴醞之間有醞又周禮緹齊之下有沈齊此醞齊之下有澄齊故云醞與盎澄與沈蓋同物也云奠之不同處重古畧近者古酒奠於室近酒奠於堂或奠於下是重古畧近其用酒之法四時之祭唯二齊三酒則自袷禘以下至四時祭皆通用也二齊醴盎也故鄭注司尊彝四時祭法但云醴盎而已用二齊者朝

踐王酌醴齊后亦酌醴齊饋食王酌盞齊后亦酌盞齊朝獻王還用醴齊再獻后還用盞齊亦尊相因也時祭之法用一齊故禮器云君親制祭夫人薦盞鄭云謂朝事時也又云君親割牲夫人薦酒鄭云謂進孰時也其行之法朝踐君制祭則夫人薦盞為獻進孰時君親割牲夫人薦酒朝獻時君酌盞齊以酌尸再獻時夫人還酌酒以終祭也賓獻皆酒加爵如禘祫之禮天子諸侯酌奠皆用齊酒卿大夫之祭酌奠用酒案司尊彛秋嘗冬烝朝獻用兩著尊饋獻用兩壺尊則泛齊醴齊各以著尊盛之盞齊醴齊各以壺尊盛之凡五尊也又五齊各有明水之尊凡十尊也三酒三尊各加元酒凡六尊也通羊烝盛明水黃烝盛鬱鬯凡有十八尊故崔氏云大祫祭凡十八尊其明水元酒陳之各在五齊三酒之上

### 惠田案以上酒醴之具

周禮秋官司烜氏掌以夫遂取明火於日以鑿取明水於月以共祭祀之明盥明燭共明水

蕙田案此條供明水火

天官冪人掌共巾冪祭祀以疏布巾冪八尊以畫布巾冪六彝

蕙田案此條具巾冪

亨人掌共鼎鑊

注鑊所以煮肉及魚腊之器

春秋桓公二年穀梁傳范注禮祭天子九鼎諸侯七

蕙田案以上供鼎鑊

春官小宗伯毛六牲頒于五官使供奉之

注毛擇毛也鄭司農云司

徒主牛宗伯主鷄司馬主馬及羊司寇主犬司空主豕  
疏頒之于五官者六卿應言六官而云五者天官尊  
不使奉牲故五官也云使共奉之者謂充人養之至祭  
日之旦在廟門之前頒與五官使共奉之助王牽入廟  
即祭義所云卿大夫贊帶而從之

地官封人凡祭祀飾其牛牲設其楅衡置其綏共其水

藁

注皆謂夕牲時也疏夕牲謂祭前之夕正祭在厥  
明二時皆有此事明據在前夕牲時言也其牛將殺

水所以洗牲  
藁所以薦牲

牛人凡祭祀共其牛牲之互與其盆簋以待事

疏詩云  
或肆或

將肆陳也謂  
陳於互者也

夏官羊人掌羊牲凡祭祀飾羔

秋官犬人凡祭祀供犬牲用牲物

春官雞人凡祭祀共其雞牲

蕙田案以上共犧牲之具

地官廩人大祭祀共其接盛

蔡氏德晉曰接盛謂藉田所入之米惟  
用以交接鬼神而爲粢盛不以給他用

舍人凡祭祀共簋簠實之陳之

春人祭祀共其齊盛之米

饌人掌凡祭祀共盛

蕙田案以上供粢盛簋簠

天官籩人凡祭祀共其籩薦修之實

醯人凡祭祀共薦羞之豆實

醢人共祭祀之齊菹凡醢醬之物

腊人凡祭祀共豆脯薦脯臠胖凡腊物

注脯非豆實豆當為羞聲之悞

也。膾膾肉，胖讀爲判，膾、胖皆謂夾脊肉。又禮家以胖爲丰體。

庖人共祭祀之好羞。

注謂四時所爲膳食，疏尋常所共者，並在內外饗。今言好羞，則是

非常之物，謂美魚之屬也。

獸人凡祭祀共其死獸生獸。

地官圉人祭祀共其生獸死獸之物。

遂師凡國祭祀共其野牲。

夏官服不氏凡祭祀共猛獸。

蔡氏德晉曰：猛獸謂

狼、熊之類，中膳羞者。

掌畜祭祀共卵鳥

地官川衡祭祀共川奠

澤虞祭祀共澤物之奠

天官甸人凡祭祀共其魚之鮮薨

人 鱉人凡祭祀共麇羸蚘以授醢人

疏醢人有麇醢羸蚘醢故以此三者授醢

甸師祭祀供野果菰之屬

地官場人祭祀共其果菰

天官鹽人祭祀共其苦鹽散鹽

注杜子春讀苦爲鹽謂出鹽直用不凍治鄭司

農云散鹽凍治者元謂散鹽鬻水爲鹽

蕙田案以上供庶羞籩豆之具

春官司服王之吉服享先王則衮冕享先公則鷩冕凡大祭祀共其衣服而奉之

蕙田案此條具冕服

典路大祭祀則出路贊駕說

注出路王當乘之贊駕說贊僕與趣馬也

司常凡祭祀各建其旗

蕙田案二條具車旗

天官掌次凡祭祀張其旅幕張尸次

注旅衆也公卿已下即位所祭祀之

門外以待事爲之張大幕尸則有幄鄭司農云尸次祭祀之尸所居更衣帳

幕人祭祀共其帷幕幄帟綬

蕙田案二條具幕次

春官司几筵掌五几五席之名物辨其用與其位凡大朝覲大饗射凡封國命諸侯王位設黼依依前南鄉設莞筵紛純加縹席畫純加次席黼純左右玉几祀先王

昨席亦如之

注鄭司農云昨席于主階設席王所坐也元謂昨讀曰酢謂祭祀及王受酢之席

蕙田案以上具几席

天官典絲凡祭祀共黼畫組就之物

蕙田案此條共黼畫組就之物

夏官校人凡大祭祀毛馬而頒之飾幣馬執扑而從之

蔡氏德晉曰幣馬取以獻神

蕙田案此條具幣馬

天官甸師祭祀供蕭茅

注鄭大夫云束茅立之祭前沃酒滲下去若神飲之故謂縮縮

浚也元謂茅以共祭之苴亦以縮酒  
苴以藉祭縮酒沛酒也醴齊縮酌

地官鄉師大祭祀共茅苴

注鄭大夫謂祭前藉也元謂苴士虞禮所謂苴荊茅長五

寸束之是也祝設於几東席上命佐食取黍稷于苴三取膚祭如初此所以承祭既祭蓋束而去之守祧云既祭藏其隋是與

春官司巫祭祀則共匱主及道布及菹館

注杜子春云菹讀爲鉏匱

器名主謂木主也道布新布三尺也鉏藉也館神所館止也書或爲菹館或爲菹飽或曰布所以爲藉也菹飽茅裹肉也元謂道布者爲神所設巾中雷禮曰以功布爲道布屬于几也菹之言藉也祭食有當藉者館所以承菹謂若今筐也主先匱菹後館互言之者明共主以匱共菹以筐大祝取其主菹陳之器則退也士虞禮曰

苴刈茅長五寸實于筐饌于西坵上又曰祝  
盥升取苴降洗之升入設于几東席上東縮

陳氏禮書茅之爲物柔順潔白可以施于禮者也故  
古者藉祭縮酒之類皆用焉茅有共于甸師者甸師  
之茅有入之鄉師有入之司巫則鄉師之所共者大  
祭祀也司巫之所共者凡祭祀也士虞有苴特牲少  
牢吉祭無苴而司巫祭祀共菹館則凡王祭祀有苴  
矣賈公彥謂天子諸侯尊者禮備於理或然

蔡氏德晉曰蕭香蒿也宗廟之祭以蕭合黍稷脾臠  
燔之詩所謂取蕭祭脂記所謂蕭合黍稷是也茅用

以泝酒謂之縮酒又  
以藉尸所祭黍稷

蕙田案以上具蕭茅匱主道布菹館

春官大司樂凡樂事大祭祀宿縣遂以聲展之

小胥正樂縣之位王宮縣諸侯軒縣

典庸器掌藏樂器庸器

注庸器伐國所獲之器若崇鼎  
貫鼎及其兵物所鑄銘也

疏庸功也言功器者

伐國所獲之器也

及祭祀帥其屬而設筍虞陳庸器

注設筍虞賦賸當以樂器  
縣焉陳功器以華國也

地官鼓人以路鼓鼓鬼享

春官大胥凡祭祀之用樂者以鼓徵學士

夏官司兵祭祀授舞者兵

司戈盾祭祀授旅賁及故士戈盾授舞者兵

蕙田案以上具樂舞庸器

春官天府掌祖廟之守藏凡國之玉鎮大寶器藏焉若有大祭則出而陳之

蕙田案此條陳寶器

天官大府邦都之賦以待祭祀

外府凡祭祀共其財用之幣齋賜予之財用

蕙田案二條具財用

地官委人以法式供祭祀之薪蒸木材

蔡氏德晉曰粗曰薪細曰蒸薪  
蒸以給炊燎木材以給張事

夏官司燿凡祭祀則祭燿

地官掌蜃祭祀共蜃器之蜃共白盛之蜃

天官凌人祭祀共冰鑑

秋官伊耆氏掌國之大祭祀共其杖咸

蕙田案以上供雜具

秋官銜枚氏國之大祭祀令禁無囂

司隸邦有祭祀則役其煩蓐之事

蕙田案二條禁令供役

應氏搗謙禮樂彙編王禮篇前期三日烹人共鼎鑊

內饗概鼎七俎于饗爨饗在門外東塾北上寺人

帥女官而致於有司世婦率饎人

饎人有奄  
有女有奚

概甑甗

七與簋簋於廩爨在門外西塾北上饗爨八十有四

牛七羊七豕七麋七鹿七狼七田  
犬七雞七魚七豕七麋七兔七

廩爨四

黍稷  
稻粱

內饗

率其屬陳鼎八十有四於鑊西北上陳俎八十有四

各于其鼎西南登鉶各八十有四又各七皆於饗爨

南

大裕則饗爨一百有八廩爨四鼎  
俎登鉶各一百有八登鉶又各九

舍人陳簋簋於

饗西簋四十有二簋五十有六

大裕則簋五十有  
四簋七十有二

司

几筵鋪筵設同几

見祭  
統

單席

見禮  
器

筵太祖於太室東

嚮北嚮羣穆祖考從之西上筵武宗於北牖南嚮羣

昭祖考從之西上

見朱子或  
問廟制辨

又筵太祖於堂南向昭

穆各三筵東嚮西嚮

大袷東西各四筵 郊特牲曰坐尸於堂禮器曰奠定詔於堂

又曰設祭于堂特牲注曰筵于戶西東面

設王昨席於室東北王位設黼

依依前南嚮設莞筵紛純加繅席畫純加次席黼純左右玉几筵國賓於牖前昨席莞筵紛純加繅席畫純設后昨席於室東南西房亦如之掌次張尸次於庭西有幄張衆幕於門外具旅幕天府設盥尸盥七王盥一匱水實於槃中簞巾在門之右洗設於阼階東南東西當東榮陳玉鎮大寶器大司樂宿縣遂以

聲展之小胥正樂縣之位典庸器帥其屬而設筭簾

陳庸器縣鼓在西階下應鼓在東階下宮縣一肆司

尊彝陳雞彝鳥彝皆有舟

此春祠夏禴之彝若秋嘗冬烝則用斝彝黃彝間祀

追享則用虎彝雉彝

兩獻尊

朝踐所用

兩象尊

饋獻所用

皆有壘

秋嘗冬烝則用

若尊壺尊間祀追享則用太尊山尊

冪人

奄人

以疏布巾冪尊以畫布巾

冪彝典瑞共玉瓚鬱人濯裸玉司烜氏共明水梓人

濯漑蒲勺玉爵玉觚玉觶璧角璧散凡洗筐於東堂

下勺爵觚觶實於筐

此職於周禮無攷據梓人爲飲器凡勺爵觚觶皆梓人爲之今

補

右戒具陳設

天官寺人祭祀之事則帥女宮而致于有司佐世婦治  
禮事

春官小宗伯辨六齋之名物與其用使六宮之人共奉  
之

天官世婦掌祭祀之事帥女宮而濯撝爲粢盛涖陳女  
宮之具凡內羞之物

疏此嬪人所掌祭祀謂祭宗廟內  
羞之物謂糗餌粉養案少牢皆從

房中來故名內羞

春官世婦祭祀比其具帥六宮之人共粢盛

注比次也其所濯概

及粢盛之饗

內宗掌宗廟之祭祀薦加豆籩

天官內司服凡祭祀共后之衣服及九嬪世婦凡命婦共其衣服

追師掌王后之首服爲九嬪及外內命服之首服以待祭祀

屨人掌王及后之服屨辨外內命夫命婦之命屨功屨散屨凡四時之祭祀以宜服之

右內官戒具

周禮天官大宰及執事視滌濯

注執事初為祭事前祭日之夕滌濯謂溉祭器

及甑甗之屬

宰夫從太宰而視滌濯

春官大宗伯宿視滌濯泣玉鬯省牲鑊

疏謂祭前一日視所滌濯祭器

潔淨與否

小宗伯省牲視滌濯

肆師凡祭祀詔相其禮視滌濯亦如之

疏謂祭前之夕視滌濯祭器亦

詔相其禮

應氏摛謙禮樂彙編王禮篇大冢宰帥執事即位於門外揖入即位於堂下宰夫升自西階舉簾視尊彘司尊彘告潔反降視玉瓚勺爵觚解於東堂下梓人告潔東北面告濯具視樂縣小胥告樂具宰夫告於太宰太宰出復外位宰夫之東塾視甒甒廩人告潔

視簠簋舍人告潔之東塾視鑊視銅鐙烹人告潔視  
匕俎舉鼎冪內饗告潔宰夫告潔於太宰命執事比  
各具修事畢太宰退大宗伯小宗伯肆師帥執事即  
位於門外揖入即位於堂下肆師與二執事視勺爵  
觚觶角散於篚取勺洗之兼執以升乃令司尊啟二  
瓦甒之蓋司烜氏告潔肆師加二勺於甒南枋覆之  
次加二勺於彛鬱人鬯人告潔加四勺於四尊加三  
勺於三壘亦如之肆師反降東北面告濯具大宗伯

出復外位肆師之西塾視染盛舍人告潔視甑甗廩  
人告潔反告於宗伯之東塾視鑊視鐙劔視匕俎舉  
鼎罍內饗告潔反告於宗伯省牲牲人告充腊人告  
備事畢告於宗伯乃退

右視滌濯泣玉鬯省牲鑊

蕙田案儀禮特牲禮祭前一日有視濯視牲  
之儀祭日有陳設及位次之事少牢禮祭日  
視殺視牲又羹定實鼎饌器又將祭即位設

几加勺載俎蓋大夫士之祭不裸不薦血腥  
惟室中尸主東面行饋食禮天子諸侯則有  
裸鬯薦腥朝踐之禮大夫士之儀簡故陳設  
省視皆在祭日天子諸侯禮繁則陳設省視  
當在祭前之日及祭之日肆師告潔告備小  
宗伯告時告備而已至於殺牲薦熟之事亦  
與大夫士之禮不同也

周禮春官太史祭之日執書以次位常

疏言執書者謂  
執行祭祀之書

若今儀注以次位常者各居所掌  
位次常者此禮一定常行不改也

大宗伯凡享大鬼治其大禮詔相王之典禮

小宗伯凡祭祀詔相祭祀之小禮凡大禮佐大宗伯祭  
之日告時於王告備於王

地官師氏凡祭祀王舉則從

注舉猶行也故書舉爲與  
杜子春云常爲與謂王與

祭祀之事 疏祭祀則郊廟是也王行之時  
師氏則從以王所在皆頌詔王以美道故也

保氏凡祭祀王舉則從

夏官太僕祭祀正王之服位詔瀆儀

司士凡祭祀詔相其瀆事

春官肆師祭之日相治小禮誅其怠慢者 祭之日表

染陳告潔展器陳告備

禮記文王世子庶子之正於公族者其在宗廟之中則

如外朝之位宗人授事以爵以官

注宗人掌禮及宗廟也 以爵貴賤異位也

以官官各有所掌也 疏此論同姓公族在宗廟之禮故云其在宗廟之中則如外朝之位也 宗人授事以爵以官者宗人掌禮之官及宗廟授百官之事以爵者隨爵之尊卑貴者在前賤者在後又以官之職掌各供其事

天官內小臣若有祭祀則擯詔后之禮事相九嬪之禮事正內人之禮事

世婦及祭之日涖陳女宮之具

女御凡祭祀贊世婦

右祭日外內叙事

周禮春官雞人大祭祀夜嘑旦以詔百官

注夜夜漏未盡雞鳴時也

呼旦以警起百官使夙興

凡國事爲期則告之時

注告其有司主事者少宰曰宗人朝服北面曰請祭期主人曰

比于子宗人曰旦明行事  
告時者至此旦明而告之

巾車大祭祀鳴鈴以應雞人

注雞人主呼旦鳴鈴以應之聲且警衆必使鳴鈴者

車有和鸞相

應和之象

右噉旦爲期

周禮春官典路掌王及后之五路辨其名物與其用說  
若有大祭祀則出路贊駕說

夏官節服氏掌祭祀衮冕六人維王之大常

旅賁氏掌執戈盾夾王車而趨左八人右八人車止則

持輪凡祭祀則服而趨

虎賁氏掌先後王而趨以卒伍

注王出將虎賁士居前  
後雖羣行亦有局分

秋官條狼氏掌執鞭以趨辟王出入則八人夾道

注趨  
辟趨

而辟  
行人

夏官太僕王出入則自左馭而前驅

齊右掌祭祀前齊車王乘則持馬行則陪乘

地官師氏凡祭祀使其屬帥四夷之隸各以其兵服守

王之門外且蹕朝

天官宮正凡邦之事蹕宮中廟中則執燭

疏凡邦之事謂祭祀之事

王當出入來往時隸僕與王蹕止行人於宮中及廟中也王出門向二處當寢晨而行爾時則宮正爲王執燭也

閭人掌守王宮之中門之禁大祭祀設門燎蹕宮門廟

門

注燎地燭也蹕止行者廟在中門之外

疏燭在地

曰燎謂若天子百公五十諸伯子男皆三十所作之狀蓋百根葦皆以布纏之以蜜塗其上若今蠟燭也

內豎若有祭祀之事則爲內人蹕

春官大司樂王出入則令奏王夏

禮記祭統君致齊于外夫人致齊于內然後會于太廟

君純冕立於阼夫人副禕立於東房

注太廟始祖廟也  
疏然後會于太

廟者祭日君與夫人俱至太廟之中並立東房以俟行事尸既入之後轉就西房故禮器云夫人在房雖不云

東西房下云夫人東酌壘尊

則知夫人在房謂西房也

禮器君在阼夫人在房大明生於東月生於西此陰陽

之分夫婦之位也

注人君尊東也天子諸侯有左右房  
疏顧命云天子有左右房此云夫

人在房又云東酌壘尊是西房也

右王及后入廟

易觀卦盥而不薦有孚顒若

程傳盥謂祭祀之始盥手酌鬱鬯於地求神之時也  
盥者事之始人心方盡其精誠嚴肅之至也至既薦  
之後禮數繁縟則人心散而精一不若始盥之時矣  
朱子本義盥將祭而潔手也薦奉酒食以祭也顒然  
尊嚴之貌言致其潔清而不輕自用

語類盥只是浣手不是灌鬯

周禮夏官小臣大祭祀沃盥

疏王將獻尸先盥手洗  
爵乃酌獻故小臣爲王

沃水盥  
手也

春官天府祖廟之中沃盥執燭

右王盥

禮記曾子問禘祭于祖則祝迎四廟之主主入廟出廟

必蹕

注祝接神者也蹕止行者也疏禘合祭祖太祖三年一禘謂當禘之年則祝迎高曾祖禘四廟主

于太祖廟祭之天子禘祭則迎六廟之主今言迎四廟者舉諸侯言也

蕙田案注疏皆以禘爲三年大禘據陳氏禮

書云攷之經傳蓋天子之禮春則禘祭夏秋

冬則合享，牲祭各于其廟，合享同于太廟。禘有三年之禘，有時祭之禘。時祭，小禘也。三年之禘，大禘也。公羊傳曰：「大事者，何大禘也？」則明時祭之禘爲小禘矣。蓋小禘止於未毀廟之主，大禘已及於毀廟之主。禮記曰：「周旅酬六尸，夫天子旅酬止於六尸，諸侯迎主止於四廟，非小禘而何？」據此，則四時之享有迎主之禮可知。

右迎主

周禮春官太祝掌六祝之辭以事鬼神示

辨六號二曰鬼號

注鬼號若云皇祖伯某 疏謂若儀禮少牢特牲祝辭稱皇祖伯某

四曰牲號五曰齋號

注牲號為犧牲皆有名號少牢饋食禮曰敢用柔毛剛鬣士虞禮曰

敢用絜牲剛鬣香合

疏大夫少牢祭故號此二牲士

祭用一豕故號一牲言香合者據曲禮黍之號也故彼

鄭注云黍也大夫士於黍稷之號合

言普淖而已此言香合蓋記者誤也

凡大禋祀肆享則執明水火而祝號

注肆享祭宗廟也 疏號祝執明水

火明主人圭潔之德云肆享宗廟也

者按宗伯宗廟之祭六等皆稱享

儀禮特牲饋食禮祝洗酌奠奠於鉶南遂命佐食啟會

佐食啟會卻於敦南出立於西南面

注酌奠奠其爵解少牢饋食禮啟會

乃奠之 疏引少牢者彼大夫禮與此士禮相變是以異也

教氏繼公曰酌奠酌其所奠之酒也不云酒而云奠因事名之

主人再拜稽首祝在左

注稽首服之甚者祝在左當爲主人釋辭于神也祝祝曰孝孫

其敢用剛鬣嘉薦普淖用薦其事于皇祖其子尚饗疏引少牢祝祝已下者欲見迎尸之前釋孝子之辭也

卒祝主人再拜稽首

少牢饋食禮祝酌奠遂命佐食啟會佐食啟會蓋二以

重設於敦南

注酌奠酌酒爲神奠之後酌者酒尊要成也特牲饋食禮曰祝洗酌奠奠于鉶南

疏酌奠酌酒爲神奠之者以其迎尸之前將爲陰厭爲神不爲尸故云爲神奠之也云後酌者酒尊要成也者

上經先設餘饌此經乃酌者酒尊物設饌要由尊者成故後設之也引特牲者酌奠之處當在鉶南此經不言

故引爲證也云重累之者以黍稷各二二者各重累于敦南欲合之也 主人西面祝在左

主人再拜稽首祝曰孝孫某敢用柔毛剛鬣嘉薦普

淖用薦歲事於皇祖伯某以某妃配某氏尚享主人又

再拜稽首

注羊曰柔毛豕曰剛鬣嘉薦菹醢也普淖黍稷也普大也淖和也德能大和乃有黍稷

疏號牲物者異於人用也

蕙田案儀禮酌奠二條注疏以爲迎尸之前將爲陰厭爲神不爲尸故云爲神奠之此大夫士陰厭之禮即周禮太祝所掌肆享執明水火而祝號者也天子諸侯有陰厭之禮故大祝有祝號之掌祭統所謂詔祝於室特牲所謂詔祝於室直祭祀于主者也周禮無陰厭酌奠之文故據儀禮補之下文既奠然有炳蕭合羶薌後有嗣舉奠即此奠也

禮記郊特牲詔祝於室坐尸於堂

注詔祝坐尸謂朝事時也疏下云用牲

于庭升首于室故知詔祝于室當殺牲之初朝事之時也詔告也

直祭祝於主

注直祭祝于主謂薦孰時也直正也祭以孰爲正則血腥之屬盡心焉而已疏薦

孰正祭之時祝官以祝辭告于主若儀禮少牢敢用柔毛剛鬣用薦歲事于皇祖伯某是也

馬氏晞孟曰詔祝於室求之內之深者也索祭祝於

祊求之於外之遠者也求之深求之遠蓋不知神之

所在而求於此則疑於彼求於近則疑於遠而庶幾

神之饗也鄭氏釋直祭祝於主謂薦孰之時謂之正

祭蓋非是也

陸氏佃曰直祭祀於主謂尸未入祝而已是之謂直  
祭若少牢祝酌奠遂命佐食啟會主人西面祝祝曰  
孝孫某敢用柔毛剛鬣用薦歲事于皇祖伯某尚饗  
當此節

蕙田案特牲此條上云殷人先求之陰周人  
先求諸陽下接詔祝於室坐尸於堂用牲於  
庭升首於室直祭祀於主索祭祀於祊不知

神之所在於彼乎於此乎山陰陸氏曰詔祝於室求諸內也坐尸於堂求諸外也用牲於庭求諸下也升首於室求之上也直祭祀于主求諸近也索祭祀於祊求諸遠也蓋皆始祭求神之事無緣中間忽雜入饋食及繹祭事鄭氏之說實未可信今考直祭祀於主即是詔祝於室是時方迎主人入室尚未迎尸祝酌奠以饗神曾子問所謂陰厭周官所謂執

明水火而祝號鄭注云酌酒爲神奠之是也  
馬氏陸氏說極是乃疏既依注謂薦孰時矣  
又引少牢敢用柔毛剛鬣云云可見孔氏亦  
以此祝爲即祝奠之祝而是時尸方未迎又  
從注以爲薦孰是騎墻之見也

祭統鋪筵設同几爲依神也詔祝於室而出於祊此交

神明之道也

注祭者以其妃配亦不特几也詔祝告事於尸也疏詔告也謂祝官以言詔告神

請其尸於室求之

蕙田案此條禮所謂見事鬼神之道詔祝于室而出於祊與特牲直祭祀於主索祭祀於祊同謂尸未迎而求神故祝酌奠於室也注疏乃以告事於尸釋之謂裸鬯饋熟酌尸之等抑泛矣經云交神明正特牲所謂于彼乎于此乎蓋道求而未得之意乃指求神之事耳故緊接上爲依神句何乃指爲饋食以後耶案鄭氏注特牲祭統兩處詔祝于室皆誤

一以爲詔毛血於室一以爲告事於尸特牲  
以詔室二字相同而誤祭統以詔祝二字拘  
泥而誤豈知詔室之事不止毛血詔祝之禮  
專指酌奠也

禮運作其祝號元酒以祭薦其血毛

疏作其祝號者祝史稱之以告鬼神

故云作其祝號元酒以祭者謂朝踐之時設此元酒于五齊之上以致祭鬼神此重古設之其實不用以祭也

蕙田案作其祝號元酒以祭正周禮太祝執  
明水火而祝號也祝號特牲少牢見於尸未

入之前則此及周禮其爲祝酌奠一節事明  
矣觀經文叙于薦其血毛之上則爲始祭依

神可知

祝以孝告

疏孝子告神以孝爲首案少牢祝曰孝孫某  
敢用柔毛剛鬣嘉薦普淖用薦歲事于皇祖

伯某以某妃配某氏  
尚饗是祝以孝告

詩小雅信南山祭以清酒從以騂牡享于祖考

箋清謂  
元酒也

酒鬱鬯五齊三酒也 疏此章言正祭之事古者成王  
爲祭之時祭神以清與酒清謂元酒也酒謂鬱鬯與五  
齊三酒也先以鬱鬯灌而降神乃隨從於後以騂牡之  
牲迎而入於廟門以獻于祖考之神此言祭以清酒廣

言祭用酒事則文當總攝諸酒然鬱人注云鬱金香草也則鬱非酒矣案三酒之名三曰清酒何知清酒非三酒之清酒者以言祭以清酒則以清酒祭神也三酒卑於五齊非裸獻所用

蕙田案祭以清酒在從以騂牡之上正與禮運作其祝號元酒以祭文在薦其血毛之上同元酒清酒指酌奠之酒而酒又必加明水加明水則太祝執以祝號者也祭以清酒則祝酌奠于鉶南者也合諸經求之則爲始祭未迎尸之前祝酌奠而爲陰厭信矣鄭以清

酒爲裸事所用疏亦以鬱鬯不得爲清酒可  
見行文之不可牽強如此

陳氏禮書曰特牲禮主婦薦豆設敦鉶主人及佐食  
宗人設鼎俎祝洗酌奠于鉶南主人再拜然後祝出  
迎尸少牢亦薦豆設敦設鼎俎祝酌奠主人再拜然  
後祝出迎尸則未迎尸之前陰厭也陰厭西南與奧  
室之闔故曰陰天子諸侯正祭上大夫有陰厭尸所  
以象神也厭所以飫神也殤之有厭爲其無尸也正

祭有厭爲其尸不存故也陰厭尊有元酒

蕙田案注疏及通典經傳通解皆不言天子諸侯祝酌奠爲陰厭之事故凡遇詔祝之事或以爲薦血毛或以爲告事于尸或以爲饋食各岐其說而不相合于元酒以祭祭以清酒或以爲廣言祭用酒事或以爲設元酒于五齊三酒之上于是天子諸侯陰厭一節竟無着落而大祝酌奠之祝亦無安排遂使周

禮太祝之祝號虛懸而無歸宿而既奠炳蕭  
之奠登餽受爵之嗣舉奠兩奠俱無根本所  
以謂天子諸侯之祭禮亡蓋亡於注釋有以  
也然觀太祝之辨鬼號執明水火而祝號則  
其爲未迎尸之前酌奠之祝號無疑也是時  
尸未迎而主先在室故特牲曰詔祝于室直  
祭祝於主祭統曰詔祝於室則其爲室中祝  
主之事而在血毛之詔尸裸獻之前無疑也

是時祝先酌奠而加以明水故禮運曰元酒以祭信南山曰祭以清酒其爲陰厭有元酒有酌奠饗神無疑也有此一節而後天子之祭陰厭之禮無闕既奠舉奠之事有本陳氏禮書謂王未迎尸陰厭也天子諸侯正祭有陰厭又曰厭所以飫神正祭有厭謂其尸不存故也又曰陰厭尊有元酒誠可謂深於禮者矣故今列入迎主之後迎尸之前俟學禮

### 者質焉

通禮蔡氏德晉曰特牲少牢禮皆自饋食始故初即設饌祝酌奠于饌南天子諸侯祭禮有裸以降神則祝之酌奠饗神自當在裸後此時尚未設饌也先安之而後裸故拜安尸當在裸前裸則神已降故祝酌奠以依之祝延尸出坐及朝踐畢仍延尸入室而舉此奠筭也祝之酌奠又預爲嗣子舉奠張本固當次于王及后裸後也天子及上公祭用五齊九獻則裸用鬱齊宜以泛齊酌奠亦如之朝踐宜醴齊饋食宜盞齊王及后俱同三醕尸則王及后宜緹齊賓長宜沈齊也

蕙田案蔡氏謂酌奠饗神及延尸入室舉此

奠筭又爲嗣子舉奠張本其說密矣更以其

說而推之燔燎炳蕭乃益爲可信祭義云建  
設朝事燔燎羶蕭見以蕭光郊特牲云蕭合  
黍稷臭陽達于墻屋故既奠然後炳蕭合羶  
蕭一炳蕭也鄭康成以祭義爲朝事之炳蕭  
以郊特牲爲饋食之炳蕭推其意蓋以朝事  
之時安得有黍稷未祭安得有奠求其義而  
不得故強分爲二禮今案郊特牲云取脾骨  
燔燎升首報陽也升首在燔燎之後則其爲

朝事無疑而郊特牲之燔蕭合羶薌宜即同  
此燔燎羶薌而既奠二字究無著落故先儒  
多疑之而未定何元子曰一祭而前後有二  
燎未知然否陳氏禮書曰蕭合胙骨黍稷而  
燔燎之在朝事之節而朝事之初有迎牲奠  
盞之禮則祭義郊特牲之文雖殊其事一也  
蓋迎牲而割之則血毛詔於室以示其幽全  
胙骨燔於堂以達其臭氣而奠定之所詔又

在其後不足謂之尚臭也據二家之言皆以鄭氏分二節爲未確而又不敢遽定是皆脫去祝酌奠一節無說以破鄭氏故陳氏又疑奠蓋之奠爲既奠之奠蓋疑之也今考郊特牲周人尚臭之下即繼之以鬱合鬯臭陰達于淵泉既灌迎牲致陰氣即繼之以蕭合黍稷臭陽達于墻屋既奠然後炷蕭合羶薌與虞氏尚氣殷人尚聲皆是始求神之時朝踐

以前之事則郊特牲之燂蕭必不在饋食之時且饋事則以人道親之不應復有求神之舉今既指出酌奠祝饗一節不惟爲嗣子舉奠張本而燂蕭之既奠亦豁然貫通無礙矣第蔡氏以此爲王及后裸之後考尸行灌禮天子及后各有一獻尸皆奠之不應再有酌奠饗神之事且饗神乃陰厭當在尸未入之前于義不合不可從

觀承案禮經雖亡散見於三禮中者未嘗不各有脉絡可通康成於禮可謂勤矣而說之不精往往騎牆而矛盾得後人融決而貫串之先王典禮乃始粲然心目可知漢人說禮之不精亦尚是讀禮之不熟耳

右祝酌奠饗神陰厭

周禮春官小祝大祭祀送逆尸沃尸盥

疏逆尸者爲始祭迎尸而入祭

義云樂以迎來是也云沃尸盥者尸尊不就洗祭特牲少牢尸入廟門盥于盥其時小祝沃水

太祝肆享逆尸令鐘鼓

王氏昭禹曰逆尸以鐘

鼓爲節太祝則令鐘鼓

禮記曾子問孔子曰尸弁冕而出御大夫士皆下之尸必軾必有前驅

少儀酌尸之僕如君之僕其在車則左執轡右受爵祭

左右軌范乃飲

疏僕爲尸御車之人將欲祭酌酒與尸之僕令爲軌祭如似酌酒與君之僕以其

爲尸則尊之似君也其在車則左執轡右受爵者尸僕受酒法也其在車謂僕在車中時也僕既所主尸車故于車執轡而受爵也尸位在左僕立在右故左執轡右受爵祭酒也君僕亦然祭左右軌范者軌謂轂末范謂

式前僕受爵將飲則祭之酒于車左右軌及前范也所以祭者爲其神助已不使傾危故也乃飲者祭徧乃自也飲

祭統君迎牲而不迎尸別嫌也尸在廟門外則疑于臣在廟中則全于君君在廟門外則疑于君入廟門則全于臣全于子

周禮天官大司樂尸出入則奏肆夏

疏謂尸初入廟時

天官掌次凡祭事張尸次

注鄭司農云祭祀之尸所居更衣帳

禮記禮器周坐尸

陳氏禮書周官掌次祭祀張尸次儀禮大夫士之禮皆祝迎尸于門外祝入門左則固張于廟門之西矣及其入也主人立于阼階東西面尸盥而進升自西階主人升自阼階祝從尸主人從祝尸入即席東面而坐祝主人西面而立皆拜妥尸尸答拜遂坐而祭焉禮記曰周坐尸詔侑無方觀儀禮大夫士之祭則人君事尸之儀畧可見矣

蔡氏德晉曰少牢禮祝出迎尸於廟門之外尸入門

沃尸盥祝延尸尸升入祝主人皆拜安尸尸答拜陸  
農師曰少牢特牲無朝踐故安尸在饋尸之初若天  
子諸侯之安尸宜在初入即席灌尸之前孔仲達曰  
在奧東面以南爲尊主尊故在南尸來升席自北方  
尸主各席坐於主北

詩小雅楚茨以妥以侑

傳妥安坐也 疏  
祝詔主人拜安尸

右迎尸入安尸

應氏搗謙禮樂彙編王禮篇祭之日雞人夜嘑旦以

詔百官巾車展軫以應雞人太史奏雞鳴於階下鼓  
人鼓路鼓應門擊柝王夙興鬱人薦鬯王裸鬯驚冕  
膳夫進食王一舉王世子及公族朝於內朝乃行駕  
玉輅典路贊駕太僕自左馭而前驅太馭掌馭行以  
肆夏趨以采齊以鸞和爲節齊右持馬陪乘王出在  
外朝典路贊說朝士序儀太僕正位公卿以下進見  
如外朝之位王步至太廟羣臣序從節服氏袞冕六  
人維王之太常虎賁氏先後王而趨以卒五旅賁氏

執戈盾夾王車而趨條狼氏八人執鞭以趨辟宮正  
蹕師氏使其屬帥四夷之隸各以其兵服守王之門  
外百官官以物至與祭者諸侯建旂孤卿建旌大夫  
士建物官府各象其事大司寇及肆師率旅賁氏先  
入清宮王后服副衣褱衣赤舄乘重翟錫面朱總自  
闈門出九嬪世嬪女御女史從內小臣前驅內豎蹕  
即位於西房王即位於門外東方西面王世子及公  
卿以下序爵於西方北面賓即位于西方東面祭僕

六人立於王後傳王命命太祝小祝立於賓西北東  
面北上小宗伯告備於王王揖先入太僕齊右祭僕  
從入虎賁氏列於兩階之東西序王先入門右大司  
樂令奏王夏御僕一人奉槃東面於庭南小臣奉匱  
水西面於槃東御僕一人奉簞巾西面于槃北乃沃  
王盥於槃上卒盥坐奠簞取巾興振之三以授王王  
拭乃入立於阼階與祭者從入列於階下如門外之  
位太祝小祝六人先時迎羣廟之主升於筵及是宗

人擯舉手曰有司具請升王登太宰奉幣從入太室  
祝在左王再拜稽首祝曰孝王某某年月吉日丁  
亥敢以嘉幣薦歲事於太祖某公以某妃配某氏

世祖

以下

尚饗王又再拜稽首祝出迎尸於廟門之外王

出降立於阼階東西面祝先入門右每尸一祝尸入  
門左王及賓皆辟位小祝沃盥如王入之儀大司樂  
令奏肆夏尸升自西階入室祝從王升自阼階大宗  
伯小宰師氏保氏御僕祭僕從祝先入東面尸升筵

坐於主北王西向立於戶內拜妥尸尸不言答拜祝拜尸答拜遂坐大冢宰及六官升入拜妥羣尸亦如

之

大裕則  
更用二

王乃退立

蕙田案應氏所叙禮儀節次多有謬悞如王夙興鬱人薦鬯此見國語係藉田之禮其祭宗廟不見有夙興裸鬯之文恐未便添入文王世子公族朝于內朝鄭注謂以宗族事會並不指祭時而言且寧有將入廟行祭而先

受朝之理又在外朝有序儀正位羣臣進見之儀俱繁冗無據既云王步至太廟又云節服氏維王之太常旅賁氏夾王車而趨忽步忽車不相照應入廟而旅賁清宮禮亦無文至入室祝拜不及酌奠尤爲踈漏

觀承案應氏禮書亦號詳明然細加考究其不免踈漏者有如此甚矣禮學之難言非有精心大力者烏足語此

五禮通考卷八十六